

1035. Chloraea patagonica Ph. Chl. spica multiflora; sepalis superiore lanceolato, lateralibus linearibus, apice incrassatis, mediano lanceolato; petalis falcatis, margine concavo verrucoso-varicoso; labello rhombeo, obsolete trilobo, loborum lateralium venis varicosis, apice paucidentato, centro setis falcatis obsito, lobi terminalis triangularis margine dentato, varicoso.

In planitie patagonica prov. Valdiviae opposita legit orn. G. Cox. — Pars inferior plantae deficit. Spica 6 poll. longa, circa 18-flora; bracteae inferiores 20 lineas longae, reliquae sensim minores, semper ovarium superantes, sed flore breviores. Sepalum superius 13 lin. longum, fere 4 lin. latum, valde acuminatum, 7-nerviū, venis parum anastomosantibus; lateralia 11 $\frac{1}{2}$ lin. longa, fere 2 lin. lata, tri- vel quadri-nervia, in parte incrassata subverrucosa. Petala sepalis aequilonga, versus apicem fere 3 lin. lata, 5-nervia; nervi laterales extus semipinnatim ramosi, reliqui versus apicem furcati. Labellum 7 $\frac{1}{2}$ lin. longum, fere 7 lin. latum; venae circa 7 processus falciformes gerunt; dentes lobi mediani breves, angusti, obtusi.